

110 年全國語文競賽客家語朗讀文章國中學生組（詔安腔）

編號 1 號

【路燈著啊】林伯殷原作

討暗，天猶真光，屋脣个路燈即著啊，若係無睺較真兜，起頭下猶正經毋知路燈已經著啊，一直愛等到天轉暗，路燈个火正會越來越光，正確確實實知自家屋脣个路燈著啊！在暗夜時頭，這支路燈拗佢屋脣个大路照到光光，拗出出入入个人車照到清清楚楚。逐日食暗頓過後，屋邊會企在路燈下答嘴鼓，共下等垃圾車來；熱天个時務，屋下底較熱，路燈下自然即變成奈涼、散步个所在，等到寒天時，路燈又變成一葩光明燈，像拗佢講，睺著佢，燒暖个屋下即到位啊！

討俚天光，路燈即開始慢慢行落戲棚，天變到越光，路燈火即越睺毋會著，頭尾，連幾時么去个嘛無人知。路燈嶄然知進退，攏毋會去和日頭搶光¹，在日時頭，路燈即在遐恬恬等，等夜時頭來个時會用好好發揮一下。

烏昏啊，路燈準時來上棚²！拗負責个所在照到光光光，時間一久啊，人嘎得路燈容壞，添放佢逐暗夜攏恁認分、恁認真，一

¹ 搶光：音 ciong^ˆ gong^ˇ；爭著出風頭。

² 上棚：音 shong^ˇ pang^ˋ；上場了。

直愛到有一夜，發現原本遐光光个所在猶暗暗，正會知路燈幾時有恁好。想起佢个舊屋，暗夜時屋脣歸片暗摸摸³，若係無擎火⁴，根本即行無路，毋使想討出半步門，毋過，即算有擎火行路，遐細粒電火球⁵發出弱弱个光照著路，驚頭那岫有蜘蛛網，照著頭那岫來，又驚蛇隨時會對路脣鑽出來，毋管自家仰子小心細義，心肝頭猶係會驚驚險險⁶，仰子比會過這下个路燈火，得人恁安心、恁自在！

一支路燈，照光个所在真有限，毋過，路燈若係一支一支連起來，遐即會用照光一個莊頭、一條街路、一座都市。路燈毋單照光一個所在，嘛減少日和夜个爭差⁷，改變人个生活。都市內个公園，夜時頭猶有人練氣功、跳舞和運動，大路嘛猶有人行路和騎鐵馬，若係無路燈，敢有可能？

暗啊！路燈又著啊！佢知路燈會拗真多暗暗个所在照到光光，得人利便起落、得人會用安心，佢嘛知有真多人和路燈共樣，恬恬在遐照亮佢人个社會。

³ 暗摸摸：音 am^ˆ mia^ˇ mia^ˇ；天色或環境暗得看不見的樣子，形容一片漆黑。

⁴ 擎火：音 kia^ˋ foo^ˆ；拿著手電筒。

⁵ 電火球：音 teen foo^ˆ kiu^ˋ；燈泡。

⁶ 驚驚險險：音 giang^ˇ giang^ˇ hiam^ˆ hiam^ˆ；感到驚險可怕的样子。

⁷ 爭差：音：zen^ˇ ca^ˇ；差別。

110 年全國語文競賽客家語朗讀文章國中學生組（詔安腔）

編號 2 號

【學泅水】徐姿華原作

佢自一溜真驚水，小學一年個時，先生鼓勵大家學泅水，講泅水係真好個運動，膺身脣個好同學做下學會曉泅水啊，逞強個佢毋願輸人，轉去屋下直亂阿依講討去學泅水。趁暑假，阿依拗佢尋著一間溫水個泅水池，猶問著名聲真好個教練來教佢，攞買一身靚靚個連身泅水衫得佢，鼓勵佢勇敢學泅水。

第一擺去到泅水池，又驚又愛。做好體操，教練渡佢和另外四個學生練習藏水覓、學換氣；教練拗佢人一個一個攙落泅水池，佢人乖乖聽教練指示，拗頭那藏入水底，佢驚到拚命揪核泅水池脣、腳踇踇毋敢沾著水、唉天唉地、嘍到目汁和鼻流流，像得人苦毒到真慘個樣；脣頭個人做下著面脛佢著面笑，教練直直拐佢，佢猶係嘍到無聲、毋肯落水，即無法度啊正請阿依拗佢渡轉去。

遐暗夜，阿怙好聲好氣鼓勵佢繼續去學泅水；阿依即唉唉唧唧感嘆：若毋去上課即會白白了學費，無通退；阿哥嘛分享自家學泅水個經驗，猶提出佢頭寶惜個摔講討做佢學會曉泅水個獎品。在大家個鼓勵之下，佢答應第二日討攞去上泅水課。

第二日晨早，阿依討載佢去上泅水課，催啊催佢猶係罔唉罔唉、拖拖趑趑毋肯停動。上課時間硬硬討毋會赴啊，阿依起性地擎出雞毛筴¹討修理佢，佢感覺真委屈，又驚阿依拓又驚愛落水泅水，即嘍到大嫵聲，歸條巷攏聽到清清楚楚。屋邊過來關心，知佢係驚泅水正嘍到大嫵聲，做下忍著笑鼓勵佢。即恁，遐站時間，晨早時頭巷頭巷尾若係聽著佢又嘍到唉唉嘍，即知遐日佢又愛去上泅水課啊。

經過三個禮拜個練習，泅水課個同學一批一批學會曉走啊，同學換了攞換，佢猶係手和腳配合毋會著，手記得划水啊腳又添放踢水，實在無奈何。有一日，佢自家練習，手和腳嘎配合會著啊，泅有五公尺恁遠，心肝底實在真歡喜啦！佢繼續練習，越來越熟手，手腳越來越省力，膺身嘛越來越輕鬆，第一擺感受著泅水個心色。

感謝遐時，屋下人支持嘛鼓勵驚水個佢面對自家個困難去學泅水，得佢有機會去克服自家軟弱個所在，這滿個佢，毋單會曉泅水，嘛會有信心迎接人生個各種挑戰。

¹ 雞毛筴：音 ge^ˊ hm^ˊ cing^ˊ；雞毛撻子。

110 年全國語文競賽客家語朗讀文章國中學生組（詔安腔）

編號 3 號

【撿田螺】郭亭好原作

真久毋識轉莊下，記得莊下个風特別涼、天特別青。熱天偌和阿妹不時得猛猛个日頭攔去大樹下藏，坐在阿怙用粗麻索編樹枋做个晃槓架面上，一儕擎一支涼沁沁个枝子冰，若西冰若晃槓架，涼凉个風吹來，猶有樹嶼歸陣蟬在遐「衣衣衣、衣衣衣」唱歌得偌人聽，一半下屋簷烏、白頭殼¹這兜嘛來鬥鬧熱，毋驚人个膨鼠，嘛會在樹嶼跳上跳落、跳來跳去。

言讀書个偌和阿妹歸日跔阿公、阿媽奈，有一日阿公討去巡田水，問講想討跔佢去撿田螺無？愛賞个偌隨應好，阿妹嘛講討跔。阿公跋上棚承嶼，搨出兩雙細雨鞋來得偌人換，攔提兩頂草帽得偌人戴，佢自家嘛戴一頂大笠婆。

阿公肩頭擎鑊頭行頭前，偌和阿妹一儕攬一隻細鉛桶跔在後背，偌人歸路唱歌真歡喜，阿公笑咪咪安謐偌人唱到真好聽，偌人風神到越唱越大聲。行到伯公下，邊脣遐平平个禾田，即係阿公耕作个田，阿公比著田脣溝底講：「你人睭這位即有田螺好撿啊，跔這細溝直直落，有真多田螺好撿哦！」阿公言講煞，阿妹

即興趣趣先跳落溝底去開始撿啊！

偌和阿妹相拚睭麼儕撿較多，兩儕即頭犁犁拚命直直撿，驚得人捎過去，麼儕嘛毋認輸。一下無堵好阿妹个雨鞋嘎塌落濫泥底，雨鞋裝淦淦个濫泥，阿妹想討掛腳拗鞋揪起來，嘎仰子都擲毋會起來，猶越塌越深，佢大聲咻偌過去拗佢鬥相共，偌揪核佢个大腳髀兩儕共下出力，落尾鞋無揪起來，兩儕嘎跌到四腳翹天，舞到歸身溼潦猶合泥，連面嘛舞到像烏貓公个樣。阿公睭著攔緊行俛來拗偌人揪揪起來，攔用手款款拗阿妹个雨鞋糝起來。阿公講：「你這兩個死孩子，等下轉去，偌即會得你阿媽罵死！」

驚得阿媽罵，轉到屋下偌兩儕偷偷囡囡趨入屋內去，阿媽影著兩隻烏貓公轉來啊，好氣又好笑，喊偌人較緊去洗浴，拗歸身烏疏疏²个衫褲換落來。佳載好性地个阿媽無受氣，毋過，猶記得遐日洗浴洗真久，硬硬討鑊去一緣皮啊，歸身猶略略仔臭泥味，這滿偌見睭著田螺即會攔想著這件心色个事。

¹ 白頭殼：音 pa teu` kog`；鳥名，白頭翁。

² 烏疏疏：音 bbu` soo` soo`；髒兮兮的樣子。

110 年全國語文競賽客家語朗讀文章國中學生組（詔安腔）

編號 4 號

【滿天星】李得福原作

來到屏東外公个檳榔園，一行行高天天个檳榔樹，聽講二、三十年前，一分地一年會用收成十外萬銀，猶愛牽電火顧檳榔，園內底若有火光，賊即毋敢來偷割。今價數真便宜，正賣過去十分之一個錢，雖然賣毋成錢，外公猶係整理到青拚拚，因為檳榔行之間有加種百香果，會用加賣一兜仔錢。檳榔樹準柱，利用廢電線搭棚，有紅電線、烏電索、雙股个白片線，邊脣用白片線牽透籠，紅烏電線橫牽直牽織成三長列个彩色百香果棚。

逐年个三月春分前後，百香果開花啊，青花托撐起茄色个花蕾頭，猶有牽白鬚个花瓣副花帽；第二緣係五皮青黃色个公个花，有真貴个花粉；頭面上緣係三支像開螺絲个活動扳手，又像豬个飯匙骨，這係嫵个花。僮識睭外公擎一支毛筆，在逐蕊花面上搵來搵去真像畫圖个樣，僮問：「阿公你在做麼个？」佢比著花蕾拗僮講：「僮拗公花个花粉搵來膏在嫵花个花蕾面上，僮正會打子結果啊！」

棚嶼吊滿一粒粒青青个細粒果子，企在棚下睭起去即像滿天星斗，阿公講佢種个百香果品種即號做「滿天星」。親像僮伸手

即摸會著嘛拚會著，擱嘛食會著个星呢！

清明過後無幾久，百香果即轉烏黝紅，睭過去暗紅暗紅無青影即會用拚啊。僮人姊妹在棚下，臥頭一粒睭過一粒慢慢相，相著若係紅到轉烏色即到分啊，甜度罅較無恁酸。拚到半菜籃攔緊扛去漕入紙箱，一擺兩擺三擺紙箱裝到淦淦，討載轉高雄冰起來款款食。熱天放學了後，阿依會拗百香果洗淨俐，在蒂頭个外皮，糝一個像五十箍銀角仔恁大个空，園在水果盤面上，僮人擎細支湯匙款款糝來食。正拚个百香果特別甜，僮一下即食七粒，酸淦酸淦越食越爽口，連鼻空啟出个氣嘛酸淦酸淦帶有百香果个味素。

阿依有時會拗百香果內底个仁和汁糝出來，加一兜冷滾水園落果汁機打，正擱用盞仔裝好園入冰箱冰，得僮人準果汁淋。逐擺若淋著這兜果汁，即會想著果棚下遐個歸頭那毛白雪雪，笑到嘴嘆嘆个外公。

110 年全國語文競賽客家語朗讀文章國中學生組（詔安腔）

編號 5 號

【供羊个叔公】羅瑞霞原作

侄公有兩兄弟，侄人蹓莊底，叔公蹓在離莊頭無幾遠个石礮脣，叔公無渡夫娘，一個人蹓在礮脣，供十外隻个羊。叔公講：一個人過日較自由，攞毋使操心擘腹，逐日快快活活過日，幾好咧！

侄自細即愛滿哪位去，講著賞攞走若飛，毋過普通時，愛上課、讀書，一日到暗即國語、數學、英文、社會、電腦，舞到侄春頭磕額，頭暈腦脹，毋過一到歇暍日，遐即係侄个天下啊！

侄頭愛去尋叔公寮，叔公屋下頭前係石礮，石礮脣有一大片个草，打早羊在礮脣食草，侄見去到位，脛著羊在遐食草，即挑持去捎羊，總愛拗羊捎到咩～咩～直直咩，侄即感覺真心色，遐時，叔公在屋內聽著羊咩咩，定著會走出來脛，脛著侄在捎羊，即罵講：死孩子，攞在遐捎羊！毋驚後次擺降个細子無尿肫。

侄脛著叔公出來，黏時喊一聲「叔公，勢早啊！」叔公雖然會罵侄，毋過嘛真惜侄，因為侄係屋下唯一个孫。叔公笑咪咪行過來，若行若講：羊食肚枵在遐食草，你莫創治佢，入來屋內侄

提糖得你食。講著有糖好食，這又係侄愛來叔公屋下个原因。叔公無家無藪，一個人蹓，所以，有好食个物件攞會留起來，等歇暍日提得侄食。

叔公雖然自家蹓，毋過屋下整理到淨淨俐俐，桌嶼無半點泥粉，歸下脛毋會出叔公係羅漢腳。侄識問過阿公，仰子叔公無渡夫娘？阿公講：「較早叔公有熟事一個蹓在莊尾个妹子，遐个妹子生做有肉攞真靚，做事真認真，兩儕感情真好，兩火灶嘛認定討結親家，無想著有一日，遐个妹子在田底做事，毋堵好得蛇咬著，遐時醫藥無發達，偲莊下堵著這兜事情，大部份攞係自家提草藥舂舂膏膏，即好啊！哪會知遐个妹子係得龜殼花咬著，無黏時送去街路得西醫脛，即恁死去。這個妹子死去對叔公打擊真大，過了後，叔公攞無愛和別个妹子行，真多人討拗叔公做媒人，攞得叔公拒絕，叔公一個人即徙到礮脣蹓啊。」

阿公講：「若係有閒，你愛較輒去和叔公做伴哦！」好啊！叔公惜侄，和佢做伴無問題啦！

110 年全國語文競賽客家語朗讀文章國中學生組（詔安腔）

編號 6 號

【放蝦籠】郭亭好原作

拜六阿怙渡偈人共下轉去莊下睺阿公、阿媽；阿公睺著偈人轉來真歡喜，阿妹頭使妮，一下從去攬核阿公講佢真想阿公，聽著阿妹嘴恁甜，阿公暢壞壞笑到哈哈嘍。在灶下無閒个阿媽，聽著偈人轉來，手擎个煎匙毋赴好放落，即攔緊行出來，手直直掌偈个頭那，笑咪咪講：「兩儕做下抽高嘛較生肉啊！真好哦！」

睡當晝起來，偈睺著阿公在無閒用飯攬米糠掌得佢歸圖，攔斷做一細圖一細圖囡入蝦籠內底，佢講等下討去放蝦籠。聽著討「放蝦籠」偈感覺真心色¹即亂討跔，起頭下阿公驚偈危險毋肯，偈直直拗阿公保證偈會細義，高不將阿公正渡偈共下去。

溪底滿哪位攏係生青苔个石頭，偈感覺著雨鞋行路真毋會慣勢，行無兩步腳險險跌倒，佳載阿公真流掠，較緊拗偈揪核，佢講逐步腳攏愛先試蹬睺望，若係毋會滑正好蹬落去。偈人慢慢行到水較淺个所在，阿公教偈蝦籠愛放在水較恬攔有石頭縫个所在，佢拗水底个細砂石用手掙平得蝦籠會用貼地，攔拗蝦籠嘴順著水流个方向，囡一粒石頭砣在蝦籠面上，講恁蝦籠正毋會得水

流走，頭尾猶愛在脣頭个大石頭面上囡幾下粒細石頭做記號，恁收蝦籠个時正知蝦籠放在哪位。偈人順著溪拗蝦籠放一路落，到俛暗啊正做下放好勢。

第二日本來和阿公講好討共下去收蝦籠，偈嘎睡到日頭炙屎肱都猶言起來。阿公自家拗蝦籠做下收轉來，正喊偈起來，招偈共下來退蝦籠。偈聽著阿公在喊攔緊跋起來，牙儘採鑪兩下即緊從出去拗阿公鬥相共。逐個蝦籠捉著个物件做下無麼个共樣，退一個蝦籠即像開一擺獎，有个捉著蝦、齊口魚，有个捉著老蟹、石斑，一半下猶會捉著湖鰻，實在真心色。

這兜對鮮鮮溪水來个好食材，在阿媽个好手路料理了後，當晝歸桌有又萋又好食个魚、蝦和阿媽種个青菜，全然豐沛，飯桌嶺偈人著面食飯著面講笑，歡喜个心情感覺著逐件菜攏足好食。烏昏偈人討轉啊，車正討駛停動，偈攔緊拗窗門鉸落來，大聲咻講：「阿公！後擺討放蝦籠定著愛記得渡偈共下去哦！」阿公著面攞手，頭那著面頤著面應好。

¹ 心色：音 sim^ˊ sed^ˊ；覺得有趣、有意思。

110 年全國語文競賽客家語朗讀文章國中學生組（詔安腔）

編號 7 號

【大樹下】謝玉賢原作

記得做細子個時，佢屋下頭前有一條細條溪，溪底輒輒脛著有幾下隻鴨，在遐洄來洄去，有時佢人細子嘛會跳落水底，和鴨共下賞水，你戽佢，佢戽你，賞到歸身溼漉漉正轉。毋過，得佢印象頭深个毋係遐條細條溪，嘎係溪脣个遐頭大樹。

遐頭大樹，佢个名號做爛布子，樹中央係空心个，毋過佢真耐命，逐年正開始熱，樹葉會跌到歸泥下，四叔即會跋到樹嶺，拗樹極剝到淨淨，毋使幾久，爛布子又會發穎，樹極一支支，樹葉生到𠵹𠵹¹，大樹下即係大家唱歌寮涼个好所在，嘛係細子人賞寮个好地方。

大樹下不時會坐一大陣人，逐儕攏擎一支扇撥啊撥，在遐答嘴鼓，七個和尚八樣腔²，下屋个阿真叔講佢个後生愛做兵啊，擎心到會死，驚佢做兵毋知會得人欺負無？擎心到目汁硬討流落來啊。上屋个阿孀，講厥女後禮拜討嫁人，喊大家去得佢請，佢問大家嫁阿女有麼个風俗無？愛砵男方麼个？菜愛舂幾多斤？扇愛

¹ 𠵹𠵹：音 hen` hen`；繁茂狀。

² 七個和尚八樣腔：音 cid` gai` bbu` shong beed` rhong kiong`；形容人多口雜，主張不一致，各有各的說法。

得麼儕檢？渡路雞愛幾多隻？雖然有歸大墩个問題，毋過阿孀猶係真歡喜，暢到嘴笑鼻嘆；佢依嘛輸人毋輸陣，拗大家講佢女考著師專啊，加幾下年出業即會用做先生，鬥趁錢啊。大家你一句佢一句鬧熱滾滾，有人嘍嘛有人笑，實在真心色。

大樹下，這裡大人在遐答嘴鼓，遐裡个細子嘛真無閒，妹子在大樹下賞扮家貨，你做爺佢做哀，爛布子串起來做戩鍊，石頭疊起來做烘爐，樹葉做青菜，樹極做箸，大家賞到真歡喜；囤子即在遐賞點膨嬰、弈紙牌；有一兜賞玻璃珠、灌土狗，這兜牛頭細子，逐個精斂斂³，脛著一墩鬆泥即知下腳有土狗，七手八腳培泥、攞水、漕水，毋使幾久土狗即走出來啊，這陣細子不時賞到愛大人擎竹修正肯轉屋下，實在真好笑。

大樹下有佢真多个回憶，係屋邊頭尾聯絡感情个所在，嘛係細子賞寮个地方。雖然童年離佢真遠啊，毋過童年个記憶猶係像在昨日共樣；遐頭根深葉靚个爛布子，像一支大大支个雨傘，保護佢人行過艱難又辛苦个日子，遐頭堅韌又耐命个大樹，到這下猶係佢生命內底精神个寄託。

³ 精斂斂：音 zin` kog` kog`；精明的樣子。

110 年全國語文競賽客家語朗讀文章國中學生組（詔安腔）

編號 8 號

【遐條大崎】黃美貞原作

蹣在伙房屋个人家，出出入入定著愛經過大崎，成過在遐跡位有種一大片个相思樹，所以大崎又號做「相思坪」。對細子來講，出門讀書愛跋崎即真艱難，毋過日總係愛過，相思坪嘛變做大家生活个一部分，佢頭記得个即係和阿雪落崎，無擋仔个事故。

上屋个阿雪大佢三歲，讀五年遐下，即自家騎鐵馬去讀書，跋崎个時，企起來拚勢箭，箭毋會贏正甘願落來用牽个，書包圍在頭前个籃內底，睺起來真風神，遐時，細子伴攏真欣羨佢。有一擺，佢在大崎堵著阿雪，佢講：「佢載你落崎討無？」佢想著阿依个叮嚀，心內唉唉唧唧¹，即講：「毋使毋使，佢自家行轉去即好啊。」阿雪信心滿滿講：「佢逐日攏溜啊轉，緊攔快，啊攔擋線正換新个，擘心麼个？」佢用手試擦睺望，車黏時擋恬，睺起來真妥當，想講試一擺即好，阿依毋會知个啦！

跋上車，在崎嶇睺落去，阿依哦！腳底撓撓，雞嫫皮直直起，阿雪講：「你會驚係無？」佢毋認輸應佢：「有麼个好

驚？」其實佢驚到討死攔毋敢講。阿雪吩咐佢捍好勢，佢兩支手揪著阿雪个衫，兩粒目珠眨到密密，車順順仔溜落去，聽著唧唧个擋仔聲，心肝加真定妥，按算等一下即到位啊。無想著，溜到半崎个時，擋仔嘎恬去，這時，阿雪放聲喝：「無擋子啊！這擺即死無命啊！」佢毋知愛仰子正好，只好踉阿雪直直喝。

砰一聲！車對對碰著一蕪笏竹，佢目珠擘金來，睺著阿雪倒在竹頭下，企毋會起來，直直唸直直唉：「足疾！足疾」佢摸一下溼溼个鼻空，手婆攏係血，原來係流鼻血啊，佳載手腳猶會用停動。佢款款跋起來，顧毋得歸鼻空个血，一路行轉去伙房屋尋人，好佳載阿泉叔兩子爺堵好轉屋下，奧多拜正擋恬，擎起廳下个藤椅，跋腳即去拗阿雪扛轉屋下，攔緊打電話請莊頭个魏先生來睺診。阿雪嘛真好運，單單手腳鑪溜皮定，毋過可能係驚著啊，暗頭直直起狂²，毋會食毋會睡，厥媽猶渡佢去陂塘下恩主公收驚。

遐條落崎逞英雄个回憶，久久想起來，心肝底猶會掣一下，雞嫫皮攔擎起來。

¹ 唉唉唧唧：音 ai` ai` zib` zib`；哀聲嘆氣的樣子。

² 起狂：音 ki` kong`；失去理性，舉止狂烈、異常。